

22/11/1997

Penubuhan NEAC langkah tepat

Hatipah Ahmad

CADANGAN penubuhan Majlis Bertindak Ekonomi Negara (NEAC) dilihat oleh penganalisis dan pakar ekonomi tempatan sebagai suatu langkah tepat ke arah meningkatkan ekonomi negara dan memerangi kesan kejatuhan nilai ringgit serta pasaran saham.

Langkah itu juga dilihat sebagai positif dan mampu membantu memulihkan sentimen pelabur ke arah meningkatkan kembali Indeks Komposit Bursa Saham Kuala Lumpur (BSKL).

Penganalisis dari Capitalcorp Securities Bhd berkata pembabitan kerajaan secara langsung dalam NEAC di bawah pimpinan Perdana Menteri, Datuk Seri Dr Mahathir Mohamad dijangka dapat melegakan rakyat terutama, peserta yang banyak terbabit dalam urus niaga tukaran asing dan pasaran saham.

"Penubuhan NEAC itu dianggap kena pada masanya kerana ia membuktikan komitmen penuh kerajaan dalam membantu negara yang mengalami keadaan ekonomi tidak menentu ketika ini, walaupun secara umumnya masalah itu dijangka tidak berpanjangan."

"Oleh itu, adalah menjadi tanggungjawab semua pihak termasuk kerajaan dan sektor swasta untuk sama berganding bahu dalam menangani kegawatan ekonomi yang menjurus kejatuhan nilai ringgit dan pasaran saham."

"Kerjasama yang padu dan menyeluruh itu bukan saja dapat melindungi kepentingan rakyat dan negara, malah ia dijangka menjamin kemakmuran negara bagi jangka masa panjang," katanya kepada Berita Harian ketika dihubungi semalam.

Kelmarin, Dr Mahathir berkata kerajaan akan menubuhkan NEAC bulan depan bagi menangani kesan kejatuhan nilai ringgit dan BSKL terhadap ekonomi negara.

Beliau berkata, penurunan nilai ringgit dan pasaran saham yang ketika ini membawa kepada kegawatan ekonomi semasa amat memerlukan satu badan yang bertanggungjawab untuk mengawal selia pergerakannya.

Oleh itu, katanya, penubuhan NEAC diharap dapat memangkinkan ketelusan pasaran saham yang kini kelihatan semakin rapuh.

Sementara itu, Eksekutif Penyelidikan dan Pembangunan Produk Malaysia di Bursa Kewangan Malaysia (MME), Nagaraju Sinniah, berkata penubuhan NEAC juga dijangka dapat memangkinkan pergerakan nilai mata wang tempatan ke arah peningkatan berbanding dolar Amerika.

(END)